

**«Հայաստանի պետական տնտեսագիտական համալսարան»  
պետական ոչ առևտրային կազմակերպության գիտական խորհուրդ**

**Ո Ր Ո Շ ՈՒ Մ**  
**07 հունիսի 2017 թվականի**

**«Ինֆորմատիկայի և վիճակագրության ֆակուլտետի  
դեկանի հաշվետվությունը» հարցի մասին**

Լսելով և քննարկելով «Ինֆորմատիկայի և վիճակագրության ֆակուլտետի դեկանի հաշվետվությունը» հարցը (զեկուցող՝ ֆակուլտետի դեկան, տնտեսագիտության թեկնածու, դոցենտ Մ.Է.Մովսիսյան)՝ գիտական խորհուրդն արձանագրում է. ֆակուլտետում 2016-2017 ուսումնական տարվա առաջին կիսամյակում ուսումնական և գիտահետազոտական աշխատանքներն իրականացվել են համալսարանի խորհրդի, գիտական խորհրդի և ռեկտորատի որոշումներին ու հանձնարարականներին համապատասխան: Դեկանատը և ամբիոնները որոշակի գործունեություն են իրականացրել ուսումնական գործընթացը պատշաճ մակարդակով կազմակերպելու, ուսումնական և գիտահետազոտական աշխատանքների որակը բարձրացնելու ուղղությամբ:

ՀՊՏՀ 2016-2020 թթ. զարգացման ռազմավարական ծրագրով նախատեսված գործողություններից 2016-2017 թթ. ֆակուլտետում իրականացվել են.

**Կրթական գործընթացի բարեփոխումներ**

Համաձայն ՀՊՏՀ 2016-2020 թթ. զարգացման ռազմավարական ծրագրի գերակայությունների՝ 2016-2017 ուսումնական տարվանից «Վիճակագրություն» մասնագիտության գծով բարձրագույն մասնագիտական կրթությունն իրականացվում է ՀՀ կրթության որակավորումների ազգային շրջանակով սահմանված չափորոշիչներին համաձայն և միջազգային փորձի ուսումնասիրության վրա հիմնված, մասնագիտական կրթական նոր ծրագրով:

2016-2017 ուստարվա ընդունելությունը կազմակերպվել է կրթական նոր ծրագրով:

2016-2017 ուստարում «Վիճակագրություն» մասնագիտության բակալավրիատի առկա ուսուցման համակարգ ընդունվել է 17 ուսանող, որից 9-ը՝ վճարովի ուսուցման համակարգում, 8-ը՝ պետպատվերի համակարգում: Ավելի ուշ, ըստ գործող կարգի՝ բուհի միջոցների հաշվին 100% փոխհատուցմամբ անվճար ուսուցման համակարգ է տեղափոխվել վճարովի ուսուցման համակարգում հրամանագրված 2 ուսանող:

Ընթացիկ ուսումնական տարվա առաջին կիսամյակի քննաշրջանի արդյունքներով (մինչև առաջին լուծարքը) ֆակուլտետում առկա բակալավրիատի ուսման առաջադիմության միջին մակարդակը կազմել է 65.4%: «Վիճակագրություն» մասնագիտության գծով առաջադիմության մակարդակը 4.6 տոկոսային կետով գերազանցել է ֆակուլտետի միջին մակարդակին և կազմել է 70.0%, «Մաթեմատիկական մեթոդներ և մոդելները տնտեսագիտության մեջ» մասնագիտության առաջադիմությունը կազմել է 64.0%, ինչը 1.4 տոկոսով պակաս է

միջին մակարդակից, իսկ «Կառավարման տեղեկատվական համակարգեր» մասնագիտության գծով առաջադիմության մակարդակը -2.8 տոկոսային կետով զիջել է միջին մակարդակին և կազմել է 62.6%: Առկա բակալավրիատում ուսման առաջադիմության պատկերն ըստ կուրսերի հետևյալն է. I կուրս՝ 64.7% (միջին մակարդակին զիջել է 1.2 տոկոսային կետով), II կուրս՝ 63.6% (միջին մակարդակին զիջել է 1.8 տոկոսային կետով), III կուրս՝ 66.7% (միջին մակարդակին գերազանցել է 1.3 տոկոսային կետով), IV կուրս՝ 70.3% (միջին մակարդակին գերազանցել է 4.9 տոկոսային կետով):

Ուսման առաջադիմության մակարդակն անհամեմատ ցածր է հեռակա ուսուցման բակալավրիատում: 2016-2017 ուստարվա առաջին կիսամյակի ամփոփիչ քննաշրջանի արդյունքներով առաջադիմության միջին մակարդակը մինչև 1-ին վերահանձնումը կազմել է 57.1%, 1-ին վերահանձնումից հետո ավելացել է 14.3 տոկոսային կետով և կազմել 71.4%:

Դիտարկվող ժամանակաշրջանում առկա ուսուցման մագիստրատուրայում ամփոփիչ քննաշրջանի արդյունքներով միջին առաջադիմությունը ֆակուլտետում կազմել է 96.7%: Ըստ կուրսերի պատկերը հետևյալն է. I կուրս՝ 93.3% (միջին մակարդակին զիջել է 3.4 տոկոսային կետով), II կուրս՝ 100% (միջին մակարդակին գերազանցել է 3.3 տոկոսային կետով):

### **Մարդկային ռեսուրսներով ապահովվածություն**

Ֆակուլտետի 3 ամբիոններում աշխատում են 56 դասախոսներ (5-ը՝ արտաքին համատեղությամբ), որից 23-ը՝ տնտեսական ինֆորմատիկայի և տեղեկատվական համակարգերի ամբիոնում, 16-ը՝ վիճակագրության, իսկ 17-ը՝ տնտեսամաթեմատիկական մեթոդների ամբիոնում:

Ֆակուլտետի պրոֆեսորադասախոսական կազմի շուրջ 70%-ն ունեն գիտությունների թեկնածուի կամ դոկտորի գիտական աստիճան:

Դիտարկվող ժամանակաշրջանում ֆակուլտետի ամբիոններն ունեն 8 ասպիրանտ: 2016-2017 ուսումնական տարվա ընթացքում ֆակուլտետի 1 ասպիրանտ պաշտպանել է թեկնածուականատենախոսություն և ստացել տնտեսագիտության թեկնածուի գիտական աստիճան:

### **Գործունեության միջազգայնացում**

Ֆակուլտետի միջազգայնացման գործընթացն իրականացվում է բուհի միջազգայնացման գործընթացի տրամաբանությամբ և դրա շրջանակներում: Մասնավորապես՝ 2016-2017 ուստարվա երկրորդ կիսամյակից ֆակուլտետի 1 ուսանող «Էրասմուս+» ուսանողների փոխանակման ծրագրի շրջանակներում երկրորդ կիսամյակի ուսումնառությունը շարունակում է Բուլղարիայի Հանրապետությունում:

Նույն «Էրասմուս+» դասախոսների փոխանակման ծրագրի շրջանակներում ֆակուլտետի 3 դասախոսներ դասախոսություններով հանդես են եկել եվրոպական տարբեր բուհերում:

2016-2017 ուստարվա ընթացքում ֆակուլտետի դասախոսների կողմից միջազգային գրախոսվող ամսագրերում հրատարակվել է 5 գիտական հոդված:

## **Ռեսուրսային ապահովվածություն**

Ֆակուլտետի լսարանային ֆոնդն ամբողջությամբ բավարարում է ուսումնական գործընթացը կազմակերպելու համար: Ֆակուլտետում առկա է համակարգչային տեխնիկայով ու պրոյեկտորով կահավորված 2 լսարան և 2 լսարատոր սրահ:

## **Կառավարման համակարգի բարելավում ու գործընթացների կանոնակարգում**

Այս գերակայության շրջանակներում 2016-2017 ուստարում մշակվել ու հաստատվել է ֆակուլտետի կանոնադրությունը:

Այդուհանդերձ, ժամանակակից աշխարհում տեղի ունեցող սոցիալ-տնտեսական, տեխնոլոգիական, ժողովրդագրական վերափոխումները նորանոր մարտահրավերներ են ներկայացնում ողջ կրթական համակարգին, և դրանց դիմակայելու ու համարժեք արձագանքելու համար անհրաժեշտ է գնահատել կրթական ողջ համակարգում առկա թերություններն ու բացթողումները և համապատասխան միջոցառումներ ձեռնարկել դրանց հաղթահարման ուղղությամբ: Այս համատեքստում անհրաժեշտ է նշել, որ ելնելով մի շարք օբյեկտիվ և սուբյեկտիվ պատճառներից՝ ֆակուլտետում առկա են որոշ թերություններ և բացթողումներ:

## **Արձանագրված խնդիրներ**

1. Հայալեզու մասնագիտական կիրառական նշանակության գրականության բացակայություն:
2. Պրոֆեսորադասախոսական կազմի կողմից հրապարակվող գիտական հոդվածների թվաքանակի ցածր մակարդակ:
3. Պրոֆեսորադասախոսական կազմի տարիքային կազմի անհամաչափություն:
4. Դասավանդման ժամանակակից ձևերի և եղանակների ներդրման անհրաժեշտություն:
5. Ուսումնական և արտադրական փորձառությունների կազմակերպման և անցկացման հետ կապված խնդիրներ:
6. Դիմորդների շրջանում ֆակուլտետի մասնագիտությունների դերի և նշանակության բարձրացման ուղղությամբ տարվող անբավարար աշխատանքներ:
7. Առաջադիմության մակարդակի մեծ տատանումները ինչպես ըստ կուրսերի, այնպես էլ ըստ մասնագիտությունների:
8. Մագիստրոսական կրթական ծրագրերի նկատմամբ պահանջարկի ցածր մակարդակ:
9. Ավարտական աշխատանքների և մագիստրոսական թեզերի գրախոսությունների բովանդակության և կառուցվածքի հետ կապված խնդիրներ:
10. Գիտահետազոտական աշխատանքներում ֆակուլտետի պրոֆեսորադասախոսական կազմի ներգրավվածության ցածր մակարդակ:
11. Ֆակուլտետի գործունեության միջազգայնացմանն ուղղված հիմնախնդիրներ, մասնավորապես՝
  - 1) ցածր է ակադեմիական փոխանակումների և միջազգային այլ ծրագրերում ֆակուլտետի պրոֆեսորադասախոսական կազմի ներգրավվածության մակարդակը: Ակադեմիական փոխանակման գործընթացի

լիարժեք իրականացման համար դեռևս լուրջ խնդիր է մնում օտար լեզվի իմացության ոչ բավարար մակարդակը.

- 2) ֆակուլտետի դասախոսների և վարչական աշխատողների՝ օտար լեզուների պատրաստվածության անբավարար մակարդակը դառնում է ոչ միայն միջազգային շփումների զարգացումը խոչընդոտող գործոն, այլև նվազեցնում է ֆակուլտետի գրավչությունն արտասահմանցի ուսանողների համար:

12. Լաբորատոր հենքի ֆիզիկական և բարոյական մաշվածություն:

13. ՈւԳԸ աշխատանքների կազմակերպման և անցկացման, ուսանողների ու մագիստրանտների ներգրավվածության ցածր մակարդակ:

Ելնելով վերոնշյալից՝ գիտական խորհուրդը

## **ՈՐՈՇՈՒՄ Է**

**1. Ինֆորմատիկայի և վիճակագրության ֆակուլտետի ուսումնական և գիտահետազոտական աշխատանքների մասին հաշվետվությունն ընդունել ի գիտություն և կատարվածը գնահատել բավարար:**

**2. Հանձնարարել ֆակուլտետի ղեկնատին՝**

- 1) համալսարանի գիտական խորհրդի և ռեկտորատի որոշումները քննարկել ֆակուլտետի խորհրդի և ամբիոնների նիստերում, առկա թերությունների վերաբերյալ մշակել համապատասխան միջոցառումներ՝ դրանք շտկելու ուղղությամբ.
- 2) ուշադրության կենտրոնում պահել ֆակուլտետում վարվող կադրային քաղաքականությունը, ամբիոնների կողմից դասախոսների ընտրության և համալրման գործընթացը՝ նախապատվություն տալով բանիմաց, ակտիվ գիտահետազոտական գործունեություն իրականացնող, մանկավարժական և մասնագիտական անհրաժեշտ ունակություններ ունեցող կադրերին.
- 3) հսկողություն իրականացնել դասալսումների գործընթացի նկատմամբ, ֆակուլտետի խորհրդում պարբերաբար քննարկել դրանց արդյունքները.
- 4) ամբիոններում աշխատանքներ իրականացնել մագիստրոսական խմբերում դասավանդման մակարդակն ու մատուցվող նյութի որակը բարձրացնելու և բարձրորակ դասախոսական կադրերով ապահովելու ուղղությամբ.
- 5) հսկողության տակ պահել դասամատյաններում ուսանողների հաճախումների և ակտիվության հաշվառման ու գնահատման գործընթացը.
- 6) ամբիոնների հետ միասին բարելավել խնամարկուների աշխատանքը ինչպես առկա, այնպես էլ հեռակա ուսուցման համակարգերում.
- 7) խրախուսել ուսումնամեթոդական ձեռնարկների, խնդրագրքերի, դասախոսությունների նյութերի նախապատրաստման և հրատարակման աշխատանքները.

- 8) ակտիվացնել ֆակուլտետի ուսանողների և դասախոսների մասնակցությունը ակադեմիական շարժունության ծրագրերին:
- 9) ակտիվացնել ուսանողական գիտական ընկերության (ՈւԳԸ) ֆակուլտետային խորհրդի գործունեությունը՝ առավելագույնս ներգրավելով հետազոտական աշխատանքի ունակություններով օժտված ուսանողներին և մագիստրանտներին.
- 10) հետևել աշխատանքային կարգապահությանը՝ խախտումների ցանկացած դեպք դարձնելով առանձին քննարկման առարկա.
- 11) առավել արդյունավետ դարձնել դեկանատի աշխատողների կողմից ուսանողներին մատուցվող ծառայությունները:

### **3. Ինֆորմատիկային և վիճակագրության ֆակուլտետի կազմի մեջ մտնող ամբիոնների վարիչներին՝**

- 1) պարբերաբար վերանայել և արդիականացնել բոլոր մասնագիտությունների և մասնագիտացումների ուսումնական պլաններն ու առարկայական ծրագրերը՝ ուղղված գործատուների պահանջների և կրթություն-աշխատաշուկա կապի ամրապնդմանը.
- 2) մշակել և թարմացնել դասավանդվող բոլոր դասընթացների առարկայական ծրագրերը՝ միասնական մեթոդաբանությամբ և կառուցվածքով.
- 3) խրախուսել հայալեզու գրքերի, ուսումնական ձեռնարկների, դասախոսությունների նյութերի, խնդիրների և թեստերի ժողովածուների հրատարակումը.
- 4) բարձրացնել յուրաքանչյուր դասախոսի պատասխանատվությունը դասավանդման որակի բարելավման, ուսանողների ակտիվության գնահատման և անհատական աշխատանքների ղեկավարման գործում.
- 5) հատուկ ուշադրություն դարձնել ամբիոնների պրոֆեսորադասախոսական կազմի սերնդափոխության գործընթացին, ասպիրանտուրայի և դոկտորանտուրայի միջոցով համապատասխան կադրերի պատրաստման խնդրին՝ կարևորելով նրանց ոչ միայն գիտահետազոտական, այլև մանկավարժական ունակությունները.
- 6) ակտիվացնել գիտահետազոտական աշխատանքները, բարձրացնել գիտական հետազոտությունների մակարդակն ու որակը.
- 7) մշակել և կիրառել դասախոսությունների, սեմինար և գործնական պարապմունքների վարման նոր, ժամանակակից և արդյունավետ մեթոդներ.
- 8) մշակել ուսումնասիրտադրական, գիտամանկավարժական և գիտահետազոտական փորձառությունների նոր ծրագրեր, պատշաճ հսկողություն իրականացնել փորձառության ընթացքի նկատմամբ.
- 9) խրախուսել «էրասմուս+» ծրագրի շրջանակներում դասախոսների փոխանակման ու գործընկեր համալսարաններում դասավանդման ծրագրերին ամբիոնների դասախոսների ակտիվ մասնակցությունը.
- 10) ապահովել կրթական և առարկայական ծրագրերի՝ առաջավոր արտասահմանյան համալսարանների ծրագրերի հետ համապատասխանությունը.

- 11) ապահովել ակադեմիական փոխանակության ծրագրերով արտասահմանյան համալսարաններում դասավանդած կամ հետազոտություններ իրականացրած մասնագետների փորձի տարածումը ամբիոնի աշխատողների շրջանում.
- 12) անմիջական հսկողություն իրականացնել համապատասխան ակադեմիական խմբերում ուսումնական գործընթացի կազմակերպման նկատմամբ, պարբերաբար լսել և քննարկել խնամարկուների հաղորդումները:

4. Սույն որոշումը քննարկել ամբիոնների առաջիկա նիստերում ու ձեռնարկել համապատասխան միջոցներ նշված հանձնարարականների կատարման համար:
5. Սույն որոշման կատարման նկատմամբ հսկողությունը վերապահել պրոռեկտորներ Պ.Ա.Քալանթարյանին, Մ.Ն.Հարությունյանին և Գ.Ի.Վարդանյանին:

Գիտական խորհրդի նախագահ՝  
07.06.2017 թ.

Կ. Լ. Աթոյան